

Na Aruba tambe tin casonan di trafication di hende

ORANJESTAD -- Den cuadro di Dia Nacional contra Traficacion di Hende, dia 18 di October proximo, Cuerpo Policial Aruba ta sigui conscientisa comunidad riba e fenomeno aki cu ta afecta hopi pais rond mundo.

Mr. Jeanette Richardson-Baars, Coordinador Nacional di Task Force Aruba contra Traficacion di Hende a laga sa cu durante e añanan cu a pasa nan a tene diferente actividad, entre otro seminario caminda a elabora riba e situacion actual di trafication humano y a invita e partnarnan for di islanan manera Boneiro y Corsou.

E aña aki e actividad relaciona cu e dia aki lo ta algo un tiki mas chikito y lo enfoca mas riba nos mesun hen-

denan, en bes di duna asina tanto atencion na otro paisnan tambe den e lucha, asina Richardson-Baars a splica.

Pa e ocasion aki lo invita e departamentonan cu tin di haber cu relacionnan exterior y cu stranheronan pa asina duna mas empuhe na e mensahe di e aña aki cu ta "Bo no ta para bo so". E mensahe aki ta mas tanto dirigi riba e victimanan di trafication di hende pa ora di haci un melding. Segun mr. Jeanette Richardson-Baars, pa por combati e fenomeno aki mester di e informacion di e victimanan pasobra sin esey no por haci hopi pa investiga y cuminsa un caso penal dilanti Hues. "Ora bo ta meld tin oportunidadnan pa yudansa. Por ta cu bo tin mester di

shelter, cu mester di un papel pa keda akinan legal, ayudo medico, entre otro".

E Altoinspector di Polis a enfatisa cu un hende no mester tin miedo pa meld cerca nan ora realisa cu nan ta un victima di trafication humano. Na tur pais tin un manera cu trafication di hende ta tuma luga, el a enfatisa. Mester habri e wowonan di nos comunidad pa nan realisa cu esaki ta sosode na Aruba tambe. Mester splica si cu e no ta sosode na e mesun manera cu e ta sosode na Thailandia of na Rusia, pero e ta algo cu ta un realidad.

E experto a referi por ehempel na e casonan unda na un cas tin un cria. Aki facilmente e empleada di cas por haya su mes den un situacion cu e ta bira victima di mal uzo di poder. E ora ey, kier pa e persona cu ta victima por bira consciente y meld cerca e taskforce.

"Un hende cu ta bin di un pais trahando ilegal akinan den sector di construccion, por ehempel, bo tin asina tanto hende cu ta involvi den esey cu no ta bay bisa nada di un otro. Pero tin un situacion cu por cualifica como trafication di hende sinembargo", el a indica.

E meta ta pa conscientisa mas hende cu ta victima of cu por sa di algun situacion pa rapor-



ta e casonan aki, ya sea cu ta trata di trafico humano of cu ta resulta den otro situacion, e coordinador di Taskforce contra trafico humano na Aruba a manifesta.

Banda di esaki el a duna di conoce cu pa dia 18 di October lo tin un programa special cu lo cuminsa pa 8:30am na Dr. Edward Cheung Center riba Sasakieweg te den oranan di merdia cu apertura dor di Minister di Husticia mr. Drs. Arthur Dowers, sigui pa un sketch teatral presenta pa Jhon Freddy Montoya. Despues lo continua cu un analisis caminda lo splica kico ta wordo haci riba e tereno aki y kico ta e situacion actual. Departamento di Salud lo tin un participacion special caminda lo enfoca riba e papel di e trahadonan sexual aki na Aruba.

Na final lo tin oportunidad pa habri e panel pa haci pregunta y comentario.

Mr. Jeanette Richardson-Baars ta haci un invitacion special na henter comunidad pa reflexiona riba e dia aki y sigur pa raporta cualkier caso di trafication humano cu por ta sosodiendo riba nos isla. "No mester tin miedo ya cu bo no ta para bo so", asina el a sigura na henter comunidad, specialmente na e victimanan. Riba a fotonan adhunto por aprecia un reunion teni recientemente na Centro di Husticia, den cual e coordinador nacional contra Traficacion di Hende ta repasa e ultimo desaroyonan hunto cu varios departamento di Gobierno cu tin un rol den e trabou pa combati y evita e fenomeno aki. □

